



插一盆花分自家

這恁久頭路盡多，長下無閒到斷烏正轉，毋過，一落屋看著桌頂插个花，用佢最靚个姿態歡迎佢轉屋，人黏皮斯鬆爽起來。一盆花像佢个解愁藥，有佢，不管生活幾困難、心情幾愠悴，全全變到小事情！所以，盡多年來為自家插一盆花，變成佢个習慣。

佢從細斯盡愛花，記得讀小學該時，教室又舊又無電火，長下暗摸摸仔，毋過，踏落教室看著壁頂吊等个幾笏花，黏時斯試著教室光亮起來，心乜跔等開朗起來。該毋係麼个名貴个花，係同學在屋角、路肩摘來个，長下最多个係大紅花、燈籠花、黃藤枝花、蓮蕉花，下把仔還有當開个石榴花、黃梔仔花、波蘿盞花摻毋知名个野花，舊舊个教室有這兜各色各樣个花，增加盡多光彩。自家教室看毋罣，佢還會去別班巡巡、看看仔，看哪班插个花最靚、最特別。對該下開始，心肝肚常常斯因等一盆無形个花，陪佢行過年輕歲月。

第一年教書在山肚，山排、坑脣開當多南薑花，學生仔看著先生好花，逐朝晨上學斯拗幾枝來學校，你摘、佢摘，教室肚、辦公室滿哪仔都插有一盆又一盆个南薑花，見看著這種花，斯分佢想起該醺醺个師生情。這下子女大咧，時間較多咧，佢長下會為自家插一盆花，五月到十一月南薑花開个時節，該斯係佢最肯插个花。這種花對佢來講，毋單淨有故事，價數又便宜，還過該鑽鼻空个清香，摻像蝶仔閉翼跳舞樣个雪白身影，實在錫佢！還有一種花佢乜盡愛插，該就係有香味个打碗花，這種花，花色多、香味優雅，插一盞，不管屋下裝潢幾簡單、家具幾平常，歸間屋黏時有氣質起來。

其實佢插花盡隨意，無麼个流派，無指定麼个花，成時出去寮，拗一把娘花轉來放在門角、壁脣，斯像摻秋天帶轉屋下樣。係好彩堵著有人賣梅花、櫻花，佢還較毋願錯過，買一把轉來插在甕肚，千姿百態个花枝，頂高點點个梅花、櫻花，斯像一幅國畫。謝到滿地个落花，佢乜毋盼得掃忒，分屋下多滴詩情畫意。到花開忒，接等暴出來青青个新芽，一枝一枝清新、單純，帶分佢春天來到个歡喜。

生活毋係日日恁順序，心情乜毋係時時恁伸揸，食飯時插一鉢花在飯桌；食茶時插一枝花在茶桌；看書時放一盆花在書桌，一盆花毋使幾多錢，但係帶分佢盡多快樂，乜摻佢个生活加添當多色彩，算來還係值得！所以插一盆花分自家，早斯變成佢生活中个一種儀式。

作者：張美容

☆詞彙學習

【燈籠花】den`lung/nung fa`：朱槿的一種，形狀像燈籠。

【黃藤枝花】vong ten gi` fa`：金露花。

【蓮蕉花】lien ziau` fa`：美人蕉。

【石榴花】shag`liu fa`：杜鵑花。

【黃梔仔花】vong gi` er fa`：梔子花。

【波蘿盞花】bo`lo ang` fa`：野牡丹。

【南薑花】nam giong` fa`：野薑花。

【最肯】zui` hen`：最常。

【伸揸】chun` cha`：平穩。